



28. februar 2024

UPA 2024/115

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Imeruersaatit puuinut akitsuutip peernissaa pillugu Naalakkersuisut UKA2024-mut  
inatsisissamik saqqummiussaqqaqqullugit peqquneqarnissaat pillugu Inatsisartut  
aalajangiiffigisassaattut siunnersuut.**

(Inatsisartunut ilaasortaq Aqqalu C. Jerimiassen, Atassut)

### **Tunngavilersuut**

Puunut akitsuut siornatigut kr.3,50-imiissimasoq 2024 januaarip aallaqqaataat aallarnerfingalugu kr.2,90-imut appartinneqarpoq. Tamannali maanna suli annikippallaarsimasoq sunniuteqangaanngitsorlu takuneqarsinnaavoq, tassami pisiassat assigiinngitsut 2023-imi pisiassaareersut akitsuusereerlugit akigisamittut akeqartuusut 2024-inngormat allanguuteqartinneqanngillat pisiniarfinni.

Assersuut State Energy kr.24,95-eqartoq 2023-imi suli taamak akeqarpoq, maannali utertissinnaaneranut qaavatigut kr.2-mik ilaneqaannarnikuulluni. Kr.0,60-imik apparneqarnera pisisartut maluginngilaat.

Nunattalu ilaannaanut taanna inatsit atuutsinneqarpoq, kitaani innuttaasut 0.25L sinnerlugu imaqartuusunut kr.2,90-inik akiliinerusartussaasut eqqanaarneqareermat.

Nunarsuatsinni suut pisut sorpassuungaluarnersut, sorsunneruppat, Covid19-iuppat assigisaasalu kingunerannik pisisinnaassutsip apparaluttuinnarnera tusartuarparput, nioqqutissallu akiisa nunarsuatsinni qaffaraluttuinnarnerat taamaattussaannartutullusooq inissisimaffigilersimavarput.

Aningaasap naleerukkiartornerata malittaanittaaq aqukkuminaatsipparput qanoq nunatsinni allatigut nioqqutissat akikinnerpaaffissaanitinneqarsinnaanissaat innuttaasullumi kaasarfiisa imaqarnerulaarnissaat.

Missingitaasimavoq puunut akitsuutip appartinneratigut nunatsinni aningaasatigut ukiumut kr.85mionik isertitaqaataasarumaartut, Nuuk Imeq A/S ukiorpenni immikkut akitsuuteqanngitsumik



pineqarsimanaerata kinguneranik, eqqussuisoqarnerulerotqarneratigullu eqquissuinermut akitsuummut pioreersukkut nunatta karsia immerluarneqarnerulerumaartoq.

Puunut akitsuu Inatsisartut inatsisaanni nr. 19, 30. Oktober 1992-meersoq eqqussinermut akitsuusersuinermut tunngasoq, kingullermillu Inatsisartut Inatsisaanni nr. 60, 20. November 2023 allannngortinneqarsimasoq pineqarpoq.

Atassummiillu maanna isumaqarpugut, appaaginnartoqarani puunut akitsuutip tamarmi peerneqarneratigut pisiassat akikillallatsinneqarsinnaasut.

**Aningaasatigut ingerlatsinikkullu pisortanut kingunerisassai:**

Inatsimmik allannguutissamik suliaqartoqarnissaanut allaffissornikkut aningaasartuutissat AC-Fuldmøgtigep ukiup affaanik nalinganik sulineranik, tassa 250.000kr.-mik naleqarnissaa naatsorsuutigineqarpoq.

Inatsisip peerneqarneratigut aningaasat isertitassaagaluartut kr.85 millionit annaaneqassapput.

**Namminersortunut aningaasarsiornikkut allaffissornikkullu kingunerisassai:**

Soqanngilaq.

**Innuttaasunut aningaasarsiornikkut allaffissornikkullu kingunerisassai:**

Soqanngilaq.